

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 266745 25 St
Zenica, 18.08.2026. godine

Općinski sud u Zenici, stečajna sutkinja Sanja Pavlić, u stečajnom postupku koji je pokrenut po prijedlogu predlagatelja EURO-OPREMA d.o.o., Rosulje b.b., Jelah, Tešanj, koga zastupa direktor Karahmet Merjema, za otvaranje stečajnog postupka nad samim sobom kao stečajnim dužnikom kao podnositeljem prijedloga, nakon provedenog ročišta 08.06.2026. godine, kome su prisustvovali privremeni stečajni upravitelj Haris Vehab i direktor društva Karahmet Merjema, donio je 18.08.2026. godine sljedeće:

R J E Š E N J E

Otvora se i zaključuje stečajni postupak nad društvom EURO-OPREMA d.o.o., Rosulje b.b., Jelah, Tešanj, zbog nepostojanja imovine za namirenje troškova postupka, te se nalaže brisanje ovog društva iz sudskog registra zavedenog pod brojem 43-01-0252-18, a po pravomoćnosti ovog rješenja.

O b r a z l o ž e n j e

Stečajni dužnik je kao predlagatelj 23.10.2025. godine podnio prijedlog za otvaranje stečajnog postupka. Rješenjem br. 43 0 St 266745 25 St od 25.03.2026. godine određeno je pokretanje prethodnog stečajnog postupka i za privremenog stečajnog upravitelja je imenovan Haris Vehab.

Da bi utvrdio stečajne razloge iz čl. 6. Zakona o stečaju (Sl. novine F BiH, broj: 53/21), sud je zakazao ročište za utvrđivanje uvjeta za otvaranje stečajnog postupka.

Ročište za utvrđivanje uvjeta za otvaranje stečajnog postupka održano je 08.06.2026.godine kome su prisustvovali, za predlagatelja i protupredlagatelja direktor Merjema Karahmet i privremeni stečajni upravitelj Haris Vehab, sa liste stečajnih upravitelja.

Privremeni stečajni upravitelj Haris Vehab je na ročištu za utvrđivanje uvjeta za otvaranje stečajnog postupka izjavio da je utvrdio da na poslovnim prostorijama i prostoru ispred poslovnih prostorija nema natpisa koji bi upućivali na to da je na toj adresi sjedište firme i da stečajni dužnik tu obavlja poslovne djelatnosti, a da je iz razgovora sa direktorom društva i na osnovu dokumentacije koja mu je bila na raspolaganju utvrdio da je društvo osnovano 2018. godine, da je pretežna djelatnost društva bila iznajmljivanje i davanje u zakup (leasing) mašina i opreme za građevinarstvo, da je poslovanje društva u potpunosti obustavljeno, da je posljednje poslovne aktivnosti društvo ostvarilo u 2022. godini, da društvo ima ukupno 2 transakcijska računa (1 u KM i 1 devizni) koji su svi blokirani radi nemogućnosti društva da izvršava svoje dospjele novčane obaveze, da društvo ima dug po osnovu javnih prihoda, da direktor društva nije u radnom odnosu i društvo nema ni jednog zaposlenog radnika, da je za potrebe ovog postupka je sačinjen finansijski izvještaj za period od 01.01.2025.godine do 30.09.2025. godine koji se nalazi u sudskom spisu, da nije sačinjen finansijski izvještaj sa 31.12.2025.godine, da društvo nema vlastito knjigovodstvo, a nema ni zaključen ugovor sa knjigovodstvenom agencijom za obavljanje računovodstvenih poslova i da osim poslovne dokumentacije koja je dostavljena sudu uz prijedlog za otvaranje stečajnog postupka, društvo djelimično posjeduje poslovnu dokumentaciju o poslovanju firme u proteklom periodu te dokumentaciju o osnivanju firme. Istakao je da je analizom bilansa uspjeha za period od 01.01.2025.godine do 30.09.2025.godine utvrđeno da u navedenom periodu društvo nije ostvarilo nikakve poslovne prihode, da u navedenom periodu društvo nije imalo ni rashoda, da je za isti period dobit društva iznosila 0,00 KM, da za isti period gubitak društva iznosi 0,00KM, da prema bilansu stanja društvo nema nikakve imovine, a ima neizmirene obaveze, odnosno da društvo nema

kratkoročne imovine, nema zaliha, sirovina, materijala, roba, gotovih proizvoda, niti ima potraživanja od kupaca, da društvo nema dugoročne imovine, nema postrojenja, opreme, namještaja, transportnih sredstava, nematerijalne imovine, niti ostale dugoročne imovine, da gubitak u poslovanju iznosi 120.977,00 KM i odnosi se u potpunosti na akumulirani nepokriveni gubitak iz ranijeg perioda, a nema gubitka tekućeg perioda, a vlasnički kapital je iskazan u iznosu od 1.000,00 KM, a ukupan kapital društva iznosi -119.977,00 KM, što znači da je društvo ostvarilo gubitak iznad visine kapitala u iznosu od 119.977,00 KM, a ta vrijednost je bila ista i na kraju 2024.godine, te da je prema Bilansu stanja na dan 30.09.2025.godine iskazana ukupna pasiva ili obaveze društva u iznosu od 119.977,00 KM, koje se u potpunosti odnose na kratkoročne obaveze i to ostale obaveze uključujući i razgraničenja. Izjavio je da je platežna nesposobnost stečajnog dužnika nastupila najkasnije dana 01.12.2022.godine jer stečajni dužnik u periodu od 01.12.2022.godine kao dana blokade računa pa do dana podnošenja prijedloga za otvaranje stečaja, što je period od preko 60 dana neprekidno, ne izmiruje svoje dospjele novčane obaveze, te da društvo ne može ni djelimično niti u cijelosti izmiriti potraživanja povjerilaca, a stečajni dužnik odnosno organ ovlašten za zastupanje stečajnog dužnika nije podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Predložio je da sud u skladu sa članom 102. st. 7. Zakona o stečaju javnim pozivom pozove povjerioce i zainteresovana lica da u roku od 30 dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 5.000,00 KM.

Predlagatelj je na ročištu izjavio da ostaje kod prijedloga za otvaranje stečajnog postupka i nema primjedbi na Izvještaj i Posebni izvještaj privremenog stečajnog upravnika od 30.04.2026

Zaključak je da društvo nema imovine koja bi mogla biti predmetom stečajne mase, s obzirom da isto proizilazi iz Izvještaja privremenog stečajnog upravitelja i Posebnog izvještaja privremenog stečajnog upravitelja od 30.04.2026. godine, Potvrde ZK ureda Općinskog suda u Tešnju br. 039-0-RZ-25-000519 od 07.04.2026. godine, Uvjerenja Službe za urbanizam, katastar i geodetske poslove Općine Tešanj br. 06-26-7-1800/26-2 od 09.04.2026. godine, Potvrde MUP-a ZDK, Odsjek za administraciju Tešanj br. 08-01-02/11-03-7-1833/26 od 07.04.2026. godine i Potvrde ASABANKA d.d. Sarajevo od 16.04.2026.godine.

Zbog svega navedenog zaključak je da društvo EURO-OPREMA d.o.o., Rosulje b.b., Jelah, Tešanj, ne posjeduje nikakvu imovinu, te da postoji stečajni razlog za pokretanje stečajnog postupka, ali da imovina društva nije dovoljna da pokrije troškove stečajnog postupka.

Kako stečajni dužnik ima obveze, a nema imovine pa ni za troškove stečajnog postupka, a zainteresirane osobe ni po proteku roka ostavljenom u rješenju donesenog od strane ovog suda nisu predujmila novčani iznos za pokrivanje troškova stečajnog postupka, to je primjenom odredbe čl. 102. stav 8. Zakona o stečaju, („Sl. Novine F BiH“ broj: 53/2021), odlučeno kao u izreci ovog rješenja.

Ovim rješenjem određeno je otvaranje i istovremeno zaključenje stečajnog postupka i brisanje ove pravne osobe iz sudskog registra.

PRAVNA POUKA:

Protiv ovog rješenja dopuštena je žalba Kantonalnom sudu Zenica u roku od 8 dana, putem ovog suda, od dana prijema rješenja.

Stečajna sutkinja
Sanja Pavlić